

Familia

De familia is pest as men hòt
nicht hòt mear bèrt, koa' gèlt ont koa' golt.

Benn as de hòst an groasn loat,
lai de dai'na lait gem der sèll as de hòst noat.

An òcksl bou rearn,
a haus bou zua kearn.

A bourt en rècht moment,
òlla zòmm z èssn a bòrma plent.

En de tinkl a liacht,
en a bètter a dòch,
en de kelt a vaier.

Òlla zòmm kòmmen gor de schbeirestn kraizer ibertrong.

Sim priaderler

Der sai' sima , der sai' priader
so du en beil van ins as de hòst liaber!
Òlla zòmmen mòch ber a bòch
Men s lai oa'n valt hòt s a loch.

Der earst ist der ma'ta,
za ma'n òmbiart der tata.

Der eirta kimmmp schubet no,
de patatn muast sa'n garo.

Der mitta ist lai bider do,
de boch o de mitt schnait er o!

En pfinzta de mia lèt se hearn,
s heib en de bis muast du kearn.

En vraita ist pòl garift de boch,
eppes guats ist en pfanndl kocht.

*En sònsta gea ber za mòrket òlla zòmm
still de kan schmi' za mòchen richtn de zòng!*

*En sunta za Mess muast du gea,
dòs ist s pest as de konnst tea!*

*Ont òlbe envir asou,
de zait geat ont nea'met boas bou!*

Oachlait

Oachlait, Oachlait,
a kloa's lantl en an roa',
bea'ne haisler òrm ont kloa'.
Lem do ist gaben runt hòrt,
gor va sèll pin i vort.

I hòn gamoat za vinnen vort òlls sèll as de hòn noat,
endarbeil ist mer plim lai an groasn loat.
An loat ver n sèll as de hòn galòt,
ont as i nèt pfuntn hòn do en de stòtt.

Do hòt s haiser, òrbet ont mear gèlt,
ober dòs ist nèt de mai' bèlt.
Oachlait, Oachlait bou pist mai du?
Do de lait saung se nanket u.

*S pest van òlls ist nou sai' lòn
gor mes ist as a bòn.
Ka diar muas i um kearn,
men de bill me vroa hearn.*